

摘藻堂四庫全書薈要

集部

欽定四庫全書薈要卷一萬四千四百五十九

集部

宛陵集卷十九

宋 梅堯臣 撰

次韻和酬裴寺丞喜子修書

唐宗典冊竟駢羅漢詔重令與削磨古聖規模猶可法
衆賢馳騁必無蹉既除太史來為尹遂用非才往補訛
代匠只憂傷手甚君宜憐我不遑他

送趙虞部士宏知蜀州

春風跨臘至雪作蝴蝶飛偏知蜀太守撩亂撲行衣何
當海棠下歌管紅袖圍一飲一斗酒決訟如發機洛陽
花自好聽從杜鵑歸

月蝕

有婢上堂來白我事可驚天如青玻璃月若黑水精時
當十分圓只見一寸明主婦煎餅去小兒敲鏡聲此雖
淺近意乃重補救情夜深桂兔出衆星隨西傾

次韻和酬刁景純春雪戲意

雪與春歸落歲前
曉開庭樹有餘妍
楊花撲撲白漫地
蛺蝶紛紛飛滿天
胡馬嘶風思塞草
吳牛喘月困沙田
我貧始覺今朝富
大片如錢不解穿

次韻和楊樂道待制詠雪

梁苑孝王跡
灞陵游客心
牧羊來海上
泛棹向山陰
興賞曾何淺
羈棲亦以深
穆歌猶在竹
郢曲自傳琴
旗凍霑天仗
槍寒拂羽林
且為豐歲慶
休作苦寒吟
掩帙都忘慮
焚香靜擁衾
晴明一登閣
暮色徧高岑

次韻和景彝閏臘二十五日省宿

君嘗編史似吳兢又直甘泉馬踏冰重臘雪花方漫漫
宿聽書架自層層案頭美酒初溫火簾底微風欲動燈
永夜未眠鍾已發此心閒寂是高僧

姪宰與外甥蔡駟下第東歸

事莫必有勝必勝難可持邇來宰相見世上多誇馳黃
金鑄佩印白玉刻佩龜朝見恃赫赫夕見同蚩蚩方得
靡不羨既處焉所施此理非一日更後當應知志士無

終窮斯言非爾欺

次韻和永叔

省樹高槐雪壓條沈沈古屋蔽疏寮每嗟守印如枯木
欲棄明珠學緯蕭漸老但知貧賤樂向來徒用歲時銷
新年不管魚龍躍安得乘風入剡樵

次韻和范景仁舍人對雪

三尺沒腰雪京華頻歲無高低相掩覆竅隙似封糊帖
缺都迷醜增妍不問枯因時混貧富遇物得圓觚眩目

曾何數流風不可圖冥冥山霧合浩浩海雲鋪未覺花
飛葉先看霰集珠落機裁扇素獵野割膚腴祭爾娥奔
月皤然叟赴醕薄才今揣稱小巧媿非夫

嘉祐己亥歲旦呈永叔內翰

堦前去年雪鏡裏舊時人不覺應銷盡相看只似新屠
酥先尚幼綵勝又宜春獨愛開封尹鍾陵請去頻

次韻和吳沖卿歲暮有懷

舊曆卷將盡慨然增永懷惟希步兵醉莫作太常齋孟

浪從人笑疎愚共世平定知當汨沒名不與功偕

次韻和冲卿元日

天心欲銷變元會罷來朝新歲起今日舊年猶昨宵凍
雲低覆闕殘雪稍封條又聽驅儼鼓群邪不可饒

次韻和景仁對雪

北風吹雪至浩蕩地疑無弈弈將如舞漫漫欲似糊沙
場行不盡銀漢落應枯興發詩千首豪吞酒百觚山川
容可改圭璧巧能圖花竟因酥點砧爭以練鋪未燭調

鼎鵠全混蔽旒珠懷昔餐衣絮誰今食黍腴善歌知寡
和醵飲遂成酺衆筆排堅陣多多困老夫

次韻三和景仁對雪

北度龍沙遠南來狗犬無玉階三尺峻粉壁萬重糊獸
餒行迷穴禽寒立並枯長川平界限大屋竦稜觚稍見
蓬萊闕初張雲霧圖受降鎗甲積罷獵羽毛鋪被褐思
懷寶游都學賣珠車皆陳漆轡人盡得瓊腴已贈吳
札席將開漢酺鳳池批詔手特地逞工夫

次韻和永叔新歲書事見寄

尖風細細欲穿簾殘雪微銷凍結簷
盞裏醪醕無限滿鏡中白髮不知添
妍童喜舞開羅幕小吏愁嘶入硯蟾
幸得從公持直筆定應無復歎虀鹽

送辛都官有終知鄂州

衣上大梁雪門前武昌車使君行有期
將逢鳥隼旗車動自輾轉旗輕自舒舒
去都越千里城在江上居黃鶴有高樓
樓頭挂蟾蜍下見鸚鵡洲葭茁可以菹
為弔禰

處士沈蹤異三閭憶昔我仲父五馬來躊躇願君訪舊
跡因報八行書

次韻王景彝正月十六夜省宿過景靈街

宮街不閉東城月圓影纔虧夜色春自躍金羈來宿省
從他錦帳欲誇人燈光遠近疑爭晝歌韻高低競起塵
我老都無游樂意似君清枕睡侵晨

送韓玉汝太傅知洋州三首

函關見殘雪褒谷聞春禽禽響通朱輪馬嘶入青林花

明亂石路雲抱寒泉岑天外漢江來城下漁網沈庖供
縮項鰻坐使宮娥斟農桑不須教古俗自通今

渭入秦宮古褒分蜀道難泉聲春雨後月色曉程寒蠶
浴桑牙短禽啼杏萼丹從來稱召杜民俗在君安

春風東來幾萬里相送入關如有情灞陵原邊柳條暗
咸陽橋畔桃花明自古恨別此兩處十千美酒瑠璃傾
日落未落車馬動子規滴血壯士驚行哉使君負膽氣
蜀道雖險心常輕是時門前大桐樹爛漫紫萼啼流鶯

弟兄同懷不可見應亦夢覺嗟遠程
太白山前一尺雨桑下問蠶田問耕
郡城夜開百姓喜喜從迢遞壺漿迎
李廷老祠部寄荆柑子

踏雪衝風馳小吏帶霜連葉寄黃柑
擗包欲咀才全動舉盞逢衰酒易酣
書尾自題知遠意筆頭親荅厭多談
故人莫覓新詩卷都似嵇康七不堪

韻語荅永叔內翰

世人作肥字正如論饅頭厚皮雖然佳俗物已可羞字

法歎中絕今將五十秋近日稍稍貴追蹤慕前流曾未
三數人得與古昔儔古人皆能書獨其賢者留後世不
推此但務於書求不知前日工隨紙泯已休顏書苟不
佳世豈不寶收設如楊凝式言且直節修又若李建中
清慎實罕侔乃知愛其書兼取為人優豈書能存久賢
哲人焉廋非賢必能此惟賢乃為尤其餘皆泯泯死去
同馬牛大尹歐陽公昨日喜疾瘳信筆寫此語謂可忘
病憂黃昏走小校寄我東郭陬綴之輒成篇聊以助吟

謳

次韻和韓子華內翰於李右丞家移紅微子種學士院

紅微花樹小扶疎春種秋芳賞愛餘丞相舊園移帶土
侍臣清暑看臨除薄膚痒不勝輕爪嫩榦生宜近禁廬
此地結根千萬歲聯華榮莫比茅茹

次韻和吳長文舍人即事見寄

莫問春風有後先但逢佳處去揚鞭桃花洞遠迷應久

杏樹壇荒迹自傳
放與曉寒能幾許
即看芳意不多偏
古來間氣爭強弱
謾費黃金拋楚權

次韻和長文社日禡祀出城

曉出春風已擺條
應逢社伯馬蹄驕
壇邊宿雨微霑麥
水上殘冰壅過橋
燕子飛來依約近
鴈行歸去試教調
北扉西掖多才思
相與飄飄在沈寥

次韻和長文禡祀郊外見寄并呈韓子華

鵲鵲知雨在桑中
雄雉雌飛自不同
胡粉未生輕蝶白

燕脂先綻野櫻紅
高樹裏鞦韆月獵獵
牆頭蓓蕾風
曉下祠壇多寄詠
衣冠方侍大明宮

送馬行之都官

昭亭山下送君時
不畏西行劒棧危
竿馬跨來身更健
吳船乘去計非遲
錢塘湖上尋雲屋
巾子峯前種槿籬
此趣已高天下士
不須功業似鴟夷

和王景彝詠薜荔

植物有薜荔
足物有蜥蜴
固知不同類
亦各善緣壁
根

隨枝蔓生葉侵苔鮮碧後凋雖可嘉勁挺異松柏

和江鄰幾省中賞小桃

年年二月賣花天惟有小桃偏占先初見嫩紅無不喜
終知俗艷幾多妍鄰翁已折郊園裏貴客爭誇粉署邊
可惜工夫吟向此會須留醉牡丹前

長歌行

世人何惡死死必勝於生勞勞塵土中役役歲月更大
寒求以暝大暑求以清維餒求以饕維渴求以觥其少

慙所惑其老病所嬰富貴拘法律貧賤畏笞撻生既若
此苦死當一切平釋子外形骸道士完髓精二皆趨死
徒足以見其情遺形得極樂昇僊上玉京是乃等為死
安有蛻骨輕日中不見影陽魂與鬼并莊周謂之息漏
泄理甚明仲尼曰焉知不使人道傾此論吾得之曷要
世間行

依韻和長文紫微春雨二首

年年潑火雨苦作清明寒梨花猶半綻塘水已迷漫愁

看日更水冷漏夜未闌酒沫起玉盞燭淚生銅盤春衣
向來脫帶眼斗覺寬試問彼俠少何處跨金鞍

春雨固多喜雖多安得愁既能勒花苞又解滋耕疇池
添痕痕漲渠有細細流不同離婦怨一落不可收定知
矜有年豈似斗粟賙西掖吳夫子吟觀意遲留正聲濟
雅頌高論等陽秋我慙才甚薄難繼東山謳

送滕寺丞歸蘇州

驅車入蜀時有弟母不往留婦侍母傍以子囑婦養昨

得閭門書婦子死泉壤此心那得安棄官提轡鞅東馳
三千里驚馬求吳槩吳槩速如飛歸來拜堂上堂前去
時樹已覺枝條長豈無懷抱感為壽酌春醖

次韻和疇永叔

春候倏已和林上鳴鳥譁前日是清明驟雨霑梨花初
聞結客游愛此物景嘉歌舞未終宴夕暮各興嗟所嗟
歸路暗嘶馬自知家公家八九妹鬢髮如盤鴉朱脣白
玉膚參年始破瓜幾日苦霖霖當道跳魚蝦閉門飲濁

繆鞞鞞繫樹了羣姝莫要劇為公歌啞啞公當是日醉
歡適不可涯孔氏有高第內自戰紛華我公豈其然秉
直異蓬麻果效歸田去願從招轅車

次韻和江鄰幾送客回同過金明池二首


送別西亭車馬塵天池回傍欲迷津畫船龍尾何時發
丹杏梢頭漏泄春

風光猶未老於人獸口泉聲瀉碧津一洗塵襟無俗慮
柳條開眼共看春

宛陵集卷十九

謹案卷十七第十頁後六行滿街撩亂得人驚刊
本撩訛掩據別本改





總校官庶吉士 臣張能照

校對官助教 臣吳省蘭

校對官庶吉士 臣戴心亨

謄錄監生 臣陳 棻

謄錄舉人 臣孫 演

欽定四庫全書薈要

集部

宛陵集卷

二十一
二十二

詳校官助教臣常循



欽定四庫全書薈要卷一萬四千四百六十

集部

宛陵集卷二十

宋 梅堯臣 撰

次韻和劉原甫紫微過予飲酒

所居汴水近未有鼓吹蛙昨日春雨晴車騎臨我家我
家苦僻遠庭下無泥沙為撇甕面醅為煎鷹爪茶乳羹
芼紫莢蜜果飮乾瓜與我相對飲但恨諸友遐笑語雖
同昔放浪不少加忽觀壁間字坐歎目昏花公壯尚若

此我老死豈賒門前賣桃李呼買婀娜華東簷大槐樹
上有鳥雀譁恃舊無猜嫌醉弁已傾斜將去還見規禮
數何檢差後從江韓米襦帶歡莫涯

送湯延賞秀才下第歸

參差綠柳上撩亂黃鶯飛失意暫時屈獨嗟千里歸淮
船行欲駛江鮒去應肥謝朓吾鄉守欣欣見綵衣

送門人歐陽秀才遊江西

客心如萌芽忽與春風動又隨落花飛去作西江夢我

家無梧桐安可久留鳳凰巢在桂林鳥哺不得共無忘
桂枝榮舉酒一以送

荅來上人春日即事

南國三衣客王城一見春花明馳道遠雨漲御溝新茗
憶山中物雲懷嶺上鄰如何異鄉感却出解空人

送楊申職方通判信州

從來饒信吏愛寶襲侈越莫買冰玉盤蒼山斲明月明
月有時生窮巖有時竭君常抱清節歷職老無闕與我

年齒同獨未變華髮又為江外行畫舸羨明發

送勾諶太丞通判潁州

潁川倒灣流欄船曲轉鉤吏迎如太守民望亞諸侯芳
圃深通野寒湖半抱州前賢多舊迹佳詠聽君留

和永叔六篇

嘉祐四年春御試進士翰林學士歐陽永叔韓子華集
賢校理江鄰幾同為詳定官有詩六篇出而使予和焉
詳定幕次呈同舍

苑樹天邊雨露勻
群公偷看錦叢新
眼穿欲折無由折
賞到人間不是春

代鳩婦言

不如作繭依蠶族
以絲自裹還自足
與爾為婦過一生
怒即分飛同轉目
辛勤哺雛寄鵲巢
子母生離因爾逐
羽毛曾未顏色衰
飲啄不計豐儉時
天陰輒遣呼輒歸
恩情紙薄誰信之
朝為夫婦夕行路
世間反覆那能知
伋妻白母非美事
後代放此誠堪悲

看花呈子華內翰

時不選數老獨嗟鬢毛未變目未花愛公深殿見桃李
長才高詠無能加紅英灼灼弄日色穠艷皎皎生鉛華
長廊垂幕風不動映柳黃鶯吟未涯燕銜新泥補巢缺
蝸壓峻陞臨角斜是時惟聞鳥雀鬧盡日不聽車輪譁
雖傳此景無分到但訝習慣猶豪誇他年造物儻有意
不使齷齪居貧家

禁中鞞紅牡丹

洛中花
之奇者

與公同是洛陽客今日論年皆作翁一見此花知有感
衰顏不似舊時紅

和鄰幾學士桃花

深殿有春人到稀武陵雖說昧當時躊躇莫憶人間世
恐至塵中悔却遲

啼鳥

提胡蘆提胡蘆爾莫勸翁沽美酒公多金錢賜醇酎名
聲墜時為不朽百舌子百舌子春泥方滑滑泥雖滑滑

輦道平莫學竹雞言
易發深宮許爾來
報春便是好鳥
同其群清聲轉入君王耳
安用穿叢苦避人
桃李無言
何所益畢竟有謝須紛紛
莫以榮華長不歇
人間已見
翟公門安不忘危
誰可貴貴時能憶困時聞

綰叔以詩遺酒次其韻

雜言

君嘗謂我性嗜酒
又復謂我耽於詩
一日不飲情頗惡
一日不吟無所為
酒能銷憂忘富貴
詩欲主盟張鼓旗
百觚孔聖不可擬
白眼步兵吾久師
君多賜壺能以遺

向口滿碗傾玻瓈醇釀甘滑泛綠蟻從此便醉醒無期
既以樂吾真亦以泰吾身莫問今人與古人

和范景仁王景彝殿中雜題三十八首並次韻

殿幕閒興

宮殿深沈處鶯花爛漫時
關關哢清吭萋萋發朱蕤
天上春應早人間日轉遲
得賢如漢盛五字變周詩

游延義閣後藥欄

授經聞漢帝嘗此講秦餘
一日承丹詔同時見子虛
來

游瓊閣外閒傍藥欄初柳絮輕粘履微條澁惹裾解歸
巢上燕思寄袖中書此鳥如矜慎飛飛與客疎

龍柏

花非龍香葉非柏獨竊二美誇芳蕤苦棟不分顏色近
紫荆未甘開謝遲群公莫以得地貴竟費佳句何足思

延義閣牡丹

花中第一品天上見應難近署多紅藥層城有射干生
雖由地勢開不許人看天子何時賞宮娥捧玉盤

奉呈諸君

參天朱閣峻拂地柳條垂太液綠波漲建章春漏遲長
人執兵立小豎插花嬉但只逢人說無由預此時

細竹

森森漢宮竹託本異孤生玉砌緣根迸朱欄與筍平朝
烟生密翠晚影漏斜明應待女媧采參差鳳琯清

夜賦

月從東殿生叢竹照脩竦葉間清露滴枝上寒禽動閒

覺萬慮空靜聞嚴鼓重官燭翦更明相看應似夢

三月九日迎駕

前殿臨朝百辟回後宮延閣九重開鳴梢已自金階出
黃屋初迎玉輦來不問偷桃方朔飽誰知載戟子雲才
羣官望幸無名姓只有窮吟許外陪

浹日

光陰天上早氣候日邊溫懸蟠時過眼飛蟲稍入軒看
花成子大聞燕養雛喧每覺瑤池宴風飄管吹繁

宮槐

漢家宮殿陰長槐嫩色葱葱不染埃
天仗龍旂穿影去
鉤陳豹尾拂枝來
青蟲掛後蜂銜子
素月生時桂並栽
我意方同杜工部
冷淘惟喜葉新開

有折景福殿後酴醾花至者

有鳥銜花出清香
不畏風初從上林發
來過未央中
族霜包密層層玉葉同
誰將作美酒醉看月生東

詩癖

人間詩癖勝錢癖，搜索肝脾過幾春。
囊橐無嫌貧似舊，風騷有喜句多新。
但將苦意摩層宙，莫計終窮涉暮津。
試看一生銅臭者，羨他登第亦何頻。

石詠

君王愛石醜，百孔皆相通。
怪狀一如此，補天有何功。
匪言不可轉，安得來宮中。
女豈比柱礎，瑩然受磨礱。

逾旬

重說已經旬，應懷獨寢人。
通宵彈玉枕，白晝拂牀塵。
幾

想迎雕輦何當快倦身門前車馬立疑是角生輪

晨起

月向西樓下天光候日開殘星明寶鑑百舌響宮槐玉井傳新汲金爐換宿灰黃門馳有詔唱第許卿來

金沙花

金有披沙得花應不可多栽培由地力艷色與天和玉座君王賞朱欄將相羅稱觴千萬壽繁葉柰香何

賜食

誰言出相是山東今日求賢欲致功
玉饌滿盤來禁裏鵠羹分鼎下天中
但知愷弟酬君賜舊訝權輿向國風
曾笑侏儒飽欲死宜思薇蕨不忘忠

賜酒

時頒光祿酒花出漢宮牆湛露承天渥
流霞落羽觴近親龍尾道遠襲雀頭香
溺殿人誰見終知曼倩狂

賜書

善經
二字

選來金殿盡英豪帝筆親承始是遭
就裏少年惟賈誼

其間蜀客乃王褒善經有意尊儒甚推澤方知待士高
歸付子孫傳百世深堂閒挂亦蕭騷

賜燭

天子賜燭昏夜時嫦娥閉月栽桂枝稱量高下惟妍辭
相與盡心無附離求安去病如上池照耀不容毫髮私
品藻一定何可移光焰奪晝資爾為宣王徒美庭燎詩
魏帝自徹月殿披我朝好士萬古垂搜索賢俊登蒿藜
孰不力吐肚膽脾枉用晏飲生脛脂雲龍將見升駸駸

燃此必欲無所遺收殘喜氣如蒸炊蜜蜂慙愧空多知
賜果

前日宮醪賜玉尊今朝持果小黃門乾桃熏李非時物
置案盈盤不次恩投以赤心思武帝握同玄璧詠劉琨
嘗聞食奠陳王業知是幽公幾世孫

檜詠

文章老重欲追古便作帝宮蒼檜詩青葱玉樹傳揚子
盤屈洪桃見左思龍鱗已愛松身直珠實還看柏葉垂

秀木艷叢那可擬但將霜雪定堅姿

柳絮

陶令生涯漉酒中門前種柳萬條新
花今吹作蓬萊雪曲舊得於關塞人
應與殘紅閒是伴不隨舞蝶去爭春
可憐輕質都無定一落銀河莫問津

殿後書事

天子尋常幸直廬裏頭宮女捧雕輿
紅泥已賜春醅酒黃帕曾經御覽書
林果鳥應銜去後燕窠蟲有落來餘

禁中事事能傳詠播在人間不是虛

雨夜

電光初照樹
戢戢葉上微風與雨和
玉腕愁聞無處柰
庭花暗落不應多
長楊靜響千重瓦
太液寒生幾寸波
洗濯青春如有意
平明濕羽未離柯

景福殿水

宮井蛟龍天矯垂
曉蜩初汲渴禽窺
清泠已向金盆貯
甘滑還從玉椀知
九醞酒醇由此得
小團茶味為留遲

閣門地脈應相似翰苑曾邀詠昔詩

歐陽永叔曾邀
余賦閣門水

雨後

新晴殿閣曉初日霧煙中柳重宮腰弱花肥粉頰豐渥
恩君自厚藜藿我纔充草木欣欣發誰知造化功

象戲

象戲本從碁局爭後宮龜背等人情今聞儒者飽無事
亦學婦人閒鬪明堂上有奇誰可勝罇中賭酒令方行
直驅猛獸如尋邑何似昇平不用兵

再觀牡丹

聞說偷觀近玉欄
腸如車轂轉千盤
無人憶著洛陽日
走馬魏王堤上看

白牡丹

白雲堆裏紫霞心
不與姚黃色鬪深
閒伴春風有時歇
豈能長在玉階陰

紫牡丹

葉底風吹紫錦囊
宮爐應近更添香
試看沈色濃如潑

不愧逢君翰墨場

七寶茶

七物甘香雜藥茶
浮花泛綠亂於霞
啜之始覺君恩重
休作尋常一等誇

庖烟

幕歷庖烟出綵油
欲通雲霧未能周
濕薪燒盡日停午
試問霏霏何處浮

省中

漢相家人尚苦疑不言
溫室樹何枝君今坦坦無猜忌
夸說皇居盡入詩

天上

紫微垣裏月光飛
玉佩腰間正陸離
天上去來知幾日
蟠桃結子是歸時

明月

明月已生城上頭
小星光滅大星流
來朝放榜出宮去
何處殘花轉入溝

再賦

誰人重詠大刀頭只願長明不願流縱使西傾必東出
寧同寒水瀉宮溝

殿中柳絮

玉几當中寶作牀無端絮惹御袍香群公唱第魚龍化
列侍金階若堵牆

宛陵集卷二十

欽定四庫全書薈要卷一萬四千四百六十一

集部

宛陵集卷二十一

宋 梅堯臣 撰

次韻景彝春宴

法座初瞻戶牖間，袞衣垂處見雲山。
滿斟玉酒傳宣盡，齊插宮花拜賜閒。
紅線織成庭下毯，明珠結出耳中環。
鬪雞旗底逢逢鼓，逐勝爭名利害關。

次韻景彝三月十六日范景仁家同飲還省宿

種桃依竹似僊家
邀對春風共泛霞
席上未觀雙舞鳳
城頭已覺聚啼鴉
忽忽跨馬人歸省
幕幕生烟樹斂花
稚子候門知我醉
東方明月照扉斜

次韻永叔試諸葛高筆戲書

公負天下才
用心如用筆
端勁隨意行
曾無一畫失
因看落紙字
大小得疎密
筆工諸葛高
海內稱第一
頻年直我来
我媿不堪七
安能事墨研
欲效前人述
懶性真嵇康
閒坐喜捫几
蟄是以持獻
公不使物受
屈果然公愛

之奇蹤寫名實豈惟播今時當亦傳異日嗟哉試筆詩
藏不容人乞

唐書局後叢芥中得芸香一本

有芸如苜宿生在蓬藿中草盛芸不長馥烈隨微風我
來偶見之乃穉彼翳蒙上當百雉城南接文昌宮借問
此何地刪修多鉅公天喜書將成不欲有蠹蟲是產茲
弱本藉爾發荒叢黃花三四穗結實植無窮豈料鳳閣
人偏憐葵葉紅

嘲景彝獨
愛葵花美

嘲江翁還接離

江簡云嘗憶張籍詩有恐傍人偷剪樣尋常懶戴出書堂

何言恐偷樣自是君婦懶五日縫一巾猶道苦未晚

次韻景彝閣後紫薇花盛開

禁中五月紫薇樹閣後近聞都著花
薄薄嫩膚搔鳥爪
離離碎葉剪晨霞
鳳皇浴去池波響
鸚鵡陰來日影斜
六十無名空執筆
穎毛應笑映簪華

送李太白歸建昌

推天以知命自古豈不然
桓魋及臧倉嘗毀聖與賢
後

人何蹈之其事實好還君居麻源谷學禮如鄭玄聲名
久已大籍籍四海傳昨因丞相舉便謂升雲烟竭來太
學館食貧向三年忽懷粉榆下歸思獨綿綿得告許暫
往落莫求楚船捋髯滄江上仰看饑飛鳶誰識鷓鴣志
閒誦莊叟篇喜問里中兒重到舊林泉洗蕩俗塵垢焚
裂跨馬羈不向世路去徒取愁腸煎雞豚粗可養禾黍
亦足田不慙莎衣蟲以葉自包纏及其飽滿時曷異冠
貂蟬君意我強寫雖慕何由緣

送林大年殿丞登第倅和州

和靖先生負美才族孫今似漢庭枚
敗亡項籍江邊廟應媿文場戰勝來

王知章尉河內

古縣太行下老槐三四株以言新作吏不似舊為儒
黃綬心猶在青雲志豈無漢朝吾遠祖不道此官麤

送祖擇之赴陝府

古來分陝重猶有召公棠之樹且能久後人宜不忘君

從金馬去郡在鐵牛旁
山色臨關險河聲出地長
罇無空美酒魚必薦嘉魴
天子憂民切行當務勸桑

中伏日永叔遺冰

日色若炎火正當三伏時
盤冰賜近臣絡繹中使馳
瑩澈肖水玉凜氣侵人肌
近日多故友分貺能者誰
信都顧貧賤物物義不遺
念我老且病赤痢生枯皮
巨塊置我前凝結造化移
畏冷不敢食有類夏蟲疑
雖然已快意何必咀嚼為
天子厚於公不使熾毒欺
公亦厚於我

將恐煎熬隨我有舐犢愛自憐小子龜

次韻和永叔贈別擇之赴陝郊

古人相送贈以言今人相送舉以酒酒行殷勤意豈疎
酒罷躊躇悲更有行當何之來者誰陝府兵吏爭迎走
壺漿往往過函關翰林惜別方攜手自言老大遇知難
願得公詩為不朽公因索筆作長謠落落寓言誠十九
我慙竹管廁宮縣縱合律度應非偶太守西行已不貧
忽獲明珠盈大斗歸立螭頭未是遲暫向棠陰問遺叟

送施緯秀才下第

君嘗老於敵輕彼羣兒嬉堅銳不可恃屢北還自疲胸
中多竒秘既無何所為東走滄海上夏果采荔枝奉親
樂無涯豈愧祿仕遲

送張山甫武功簿

洛陽舊交有七人五人已為泉下塵各家生兒為門戶
惟子弟兄先立身我與信都侯獨在喜見及祿知天仁
昨日聞補武功吏氣調欲與南山親少年勉力向職事

莫學老貪文字新

送微上人歸省天台

釋子懷慈母吾儒未易輕不尋琪樹去肯向石橋行海
近雲多潤山高日少晴天恩新賜服書字欲傳名

寄天台梵才上人

嘗觀月從東海出想照石橋旁畔人試問當年與今日
清光不改只如新

送李信臣尉節縣先歸湖州

梁王吹臺側五月多荷花荷開對翹鷺吳客還思家家
在水中城四面如鋪霞焉能長相守千里獨起嗟補官
東海上物景莫言賒

送王巡檢之定海

休淬鵬鷲劍休調鵲血弓平時自壯大何所立戰功得
兵不滿百防寇滄海東駕船如飛鷲出入巨浪中苟能
勇於此遇敵無廢忠

同梅二十五飲永叔家觀所抄集近事劉敞

陶令一畝宅尤愛北窗風心遠地誠僻客來尊不空觀
書太史氏全性市門翁子亦何為者於此清賞同

來上人歸宣城兼東太守孫學士

李白不厭昭亭山看盡飛鳥雲獨閒我今相送一懷想
想在謝公窗戶間

始作鷺子巾

裏髻不裏額自名鷺子巾翼覆尾涎涎誰問巢由人

謹賦

避暑就高臺不如避賢人賢人若冰雪論道通鬼神自
言信手書字字事有因往往得遺逸烜赫見名臣是日
劉夫子拍手氣益振重覩太史公吾徒幸來親大笑舉
玉杯陶然任天真內樂不復熱豈以身為身

送侯孝傑殿丞簽判潞州

同在洛陽時交游盡豪傑倏忽三十年浮沈漸磨滅惟
餘一二人或位冠夔禹我今存若亡似竹空有節人皆
欲吹置老硬不可截君自緱山來別我不畏熱言作潞

從事家貧祿仕切六月上太行辛勤非計拙天當氣候
涼清風自騷屑雖云數日勞斗與炎蒸絕君本公王孫
才行實修潔鏘鏘發英聲瑩瑩如佩玦是為君子器終
見不渝涅相逢未易期夢寐歸鼓枻

送張子野知虢州先歸湖州

未赴虢太守暫歸吳興家吳興近洞庭橋林正吹花君
當橋袖時摘包帶霜華清甘不楚齒若酒傾殘霞谿山
小女兒姍姍兩髮了裏裏上艷觥嘈嘈弄琵琶是時與

之醉何似走塵沙

送尹瞻駕部監靈僊觀

天地如轉磨屑屑今古人一落大化手團品惟其新不
幸積不用衮衮同埃塵日月行何窮過盡千萬春人生
占幾許百歲猶比晨君求瀟山潛捨去兩朱輪願效陶
淵明翦紗為破巾山前溪多鱗山下酒甚醇看雲舉大
杓杓造舒州民李白嘗愛之死生曾與均此志我亦有
更將猿鳥親

送朱玠戶曹之廣德軍

南方小兒纔讀書往往得官呵路衢君今五十始作掾
手板青袍非壯圖况來桐汭水上城折腰強顏休歎吁
城西古祠能致雨歲不有旱民無逋民樂未央君可娛
舊俗不與吾鄉殊

次韻和永叔原甫致齋集禧

廟壘靈祠屬二公齊心相望切朱宮綠渠繚繞墉垣水
廣沼清泠漲殿風已詠應麟來五時仍歌翔鴈雜殊翁

遙知畢事期尋勝尚問衰羸未厭窮

送王司徒定海監酒稅

悠悠信風帆杳杳向滄島商通遠國多釀過東夷少懷
鄉寄書遲見日知晨早應聞有海花何必樹萱草

端明李侍郎挽歌三首

少年為侍從名譽竟軒騰每吐胸中鳳寧容筆上蠅受
釐延漢室被謗過周陵今日泉宮啟師臣禮秩增

官豈不為達其如望未充敏辭傾一代發問詘三公厭

向承明直思行邵伯風嗟嗟玉樹折埋沒彼蒿宮
秋樹無黃鳥蟬聲亦自哀素車新隴去白馬舊賓來薤
上朝陽露池中歲劫灰短長何足較嗣子有高才

次韻和永叔夜聞風聲有感

月落夜正黑風起庭槐端窗間星動搖枕上人寤歎所
歎吹陰雲苦熱彌不歡當其氣莫出曷若無衣寒虛堂
卧竹簟汗體如露溥驅蚊爇蒿艾寧復襲芝蘭煎灼一
如此衰枯誰可完消磨任寒暑安有不死丹三伏已過

二炎赫應漸殘試看蜣螂蟲辛勤方轉丸焉得從釣舟
逆上嚴子湍此事人所易謝榮為獨難誰顧萬古名黑
石持鐫刊風聲不用撼牀頭閒素紈

次韻和永叔石枕與笛竹簟

溪上枕剖龍卵石斲匠簞製蛇皮紋客從東方一持贈
竹色蒸青石抱雲磨沙斲骨自含潤飽霜弔節無留塵
京師貴豪空有力六月耐此炎蒸劇旱風赤日吹熱來
大廈高簷任雕飾頭顱汗匝無富貧雖有頌冰論官職

官高職重冰則多日永冰消難更得惟公掃室施枕簟
迎涼自感東方客東方客應非俗昏能使賢人心體適
賢人何以偏伏人天下才名方赫赫我吟困窮不可聽
晝夜蚊蚋蒼蠅聲蠅如遠雞耳初感蚊若隱雷空際鳴
葛廚頂綻屋蝸墮管席中裂麻經橫平生賦分只煎炒
安有綠玉琉璃清猶勝昔年杜子美老走耒陽牛舄死
因思楊惲廢時言但願人生行樂爾公今事業在朝廷
去就尤當慎終始待公睡足秋風來去奉高談揮麈尾

寄題朱表臣職方真州新園

青葱江上樹，香藹宮前道。道側有新園，園中無惡草。松隴方在望，茅屋聞已考。朝廷正急才，何得言歸老。

次韻和原甫閣下午寢晚歸見示

殿閣風來夏日長，青林抽嫩見餘芳。筆供五吏詞休敏，簟展雙紋睡正涼。故事早歸何獨晚，舊交新詠尚無忘。不言偃仰中國樂，還愛眉間喜色黃。

三十二弟寺丞歸宣城因寄太守孫學士

謝公下車日郡內一登望昭亭山蒼蒼寒谿水潏潏
清宛微渾三洲分細浪小艇下灘來群鷗舞潭上借問
鷗何若水深魚莫向鷗餒猶識機魚樂不忘餉子去見
太守於我必有訪但寄此薄言罇前為之唱

送刁景純學士赴越州

會稽迎太守舟屋畫粉艫前舟載圖書後舟載女樂月
出鏡湖心長笛使孤作還見漁者來曾令李暮愕吹裂
比竹管士果不可度二分學宮裝艷色鬪京洛嘗聞有

西子菡萏不相若得郡考故跡精絕古所忤慎莫為俗
牽乘閒數斟酌

送宋郎中知商州

孝孫

商於六百里太守二千石地廣任亦重車建旗仍赤嘗
聞四老人采芝留舊跡古廟藏空山曾無漢羽翼其事
有圖畫家傳多典籍願君為政閒按覽知疇昔

六月晦日定力院同原父賦送伯鎮景純樞言三
學士

清秋三黃鵠舉翼東來飛鳴聲既相呼烟水亦相依蓬
池不暫止太液未言歸酌酒望滄海飄飄思菊衣

次韻和景彝省闈宿齋二首

晝日南宮雨後涼齋嚴官重靜於常庭前闌雀墮還起
欄下秋花落自香看盡雲容天漏碧讀殘書帙卷披黃
九衢塵土莫能到蕭瑟微風葉響廊

新月斜光依約見夜蟬高樹有時鳴曲眉不想西家樣
餒腹還思二子清迭代物華何足較古今榮辱豈須驚

靜來應覺能閒少人事區區逐日生

送刁景純知會稽

前有朱翁子後經王右軍至今風俗美自昔誦歌聞秦
望臨丹戟耶溪漱白雲只因絲管去驚動海鷗羣

次韻荅王景彝聞余月下與內飲

仰頭看月見新鴻形影雙飛玉鑑中呼我作卿方舉酒
更煩佳句賞高風

次韻和景彝對月

蕭蕭風雨變涼意索索晚雲開斗晴已洗浮埃天外靜
忽生圓月樹頭明草根蟲穴吟來久屋角星河落更清
我愧西垣侍臣比景寒霜鬢兩三莖

和景彝新秋西閣獨直

池頭鳳皇寒井上梧桐老鳳寒浴已晚桐老脫亦早是
時有詞臣獨直正視藁嚴嚴代王言落落實清藻演成
五色絲世作非常寶賤如市朝捷裒若華袞好四方號
令施萬耳昏聾掃此職惟其才用居寧草草



宛陵集卷二十一

欽定四庫全書薈要卷一萬四千四百六十二

集部

宛陵集卷二十二

宋 梅堯臣 撰

次韻景彝奉慈廟孟秋攝事二十韻

闕宮初告饗駕輅已迎秋公衮惟時攝齋廬用爾休椒
漿茲往奠鸞馭或來游任姒徽音繼邦家故事修前期
嚴受誓侵曉肅傳騶雞狗藏深戶蚊蠅響暗溝別祠緣
相漢舊禮倣宗周肅氣接庭燎鼓聲通市樓樂章分廟

奏牲物用毛柔木主升新座牙盤列庶羞叩階除劒履
宿羽動梧楸錫胙人移俎焚辭漏晷籌豆邊將降陞胥
史劇奔牛事畢歸烏巷陰餘晦綵油驅車多叱咤負擔
起歌謳却直中書省重瞻十二旒詞供五更敏詔示四
方優密議存王體斜封賫禹謀勤誠酬異等潤色闡嘉
猷強擬鄴中詠我思康樂侯

次韻和景彝秋興

日月機上梭年華東注波未驚涼葉墮已見白髮多牧

馬歸方健調方力漸和籬邊賸曉菊陶令柰貧何

司徒陳公挽詞二首

位至三公有恩加賜諡無再調金鉉鼎屢剖玉麟符已
歎鸞同穴還嗟鳳少雛擁途看鹵部誰為畢三虞

公在中書日朝廷百事崇王官多不喜天子以為忠富
貴人間少恩榮歿更隆若非笳鼓咽寂寞柰秋風

秋思

梧桐在井上蟋蟀在牀下物情有與無節候不相假寥

寥風動葉颯颯雨墮瓦耳聽心自靜誰是忘懷者

送葉都官赴蜀州倅

仲舒

每有人之蜀先憑問海棠徒知花底醉不報樹頭芳上
馬秋風急登山古路長西南生片月遙想見清光

次韻荅吳長文內翰遺石器八十八件

山工日斲器殊匪事樵牧掘地取雲根剖堅如剖玉食
具與果具待賓良有勗亦將茶具并飽啜時出俗公何
都贈予金多不入目我家固宜之瓦椀居漏屋得此尤

稱窮客來無不足惟應赤脚婢收拾怨常酷夏席堆青
齏冬盤釘旨蓄竟無粱肉饌甚愧蕭家錄

送張君儀太祝簽判奉寧軍

社雨燕巢空古陂菱葉老燕去春當還菱枯秋不早莫
以西風高於馬亂懷抱指途無幾里駛馬一秣草彼美
賢主公文章為世寶笑談樽俎間勿負風月好

寄題陽武宰王安之慶豐亭

官為人父母身自奉其親結宇後園中散步以怡神寒

溫適所適朝夕饋爾珍諸孫同在傍嬉戲情各均庭下
香草秀梁上乳鳥馴乳鳥名曰烏反哺豈不仁香草名
曰蘭相襲使之紉二物已可知百里風俗淳

北州人有致達頭魚于永叔者素未聞其名蓋海
魚也分以為遺聊知異物耳因感而成詠

孰云北海魚乃與東溟異適聞達頭乾偶得書尾寄枯
鱗冒輕雪登俎為厚味向來昧知名漁官疑竊位有如
臧文仲不與柳下惠從茲入杯盤應莫慙鮑肆

送柳秘丞大名知錄

瑾

言今魏都去聽我願少休地息戎馬救民苦黃河流渾
渾發西極奮奮入九州自古患決溢于今為瘡疣禹力
順而東漢防築其隙完壞非一日利害經千秋主印無
切責治水莫輕謀府公山西種貴已為通侯樽酒與歌
舞上客共優游

送何都官通判虔州若谷

楚越封圻接帆檣上下頻商通洲橘熟信到嶺梅春白

紆歌脩頸金盤饋紫鱗同勤太守職龍共遂漢名臣

秋雷

春雷不發蟄秋雷不收聲向無一日雨今無一日晴昨
夕玉女笑閃閃揚目晴雷公與雨師自取號令明舒慘
由上天誕妄推五行日月不粒食安問下土耕雖然屋
瓦爛還有地菌生損彼以益此誰能較人情堯時不無
水用禹水乃平黎民思堯仁往往見於夢猶吾大君意
星火立水衡水衡雖努力豈將雷雨爭

送俞尚寺丞知蘄春縣

應見言風物于今有貢蛇潛蹤遠鼃黽飲露上蕪段清
潔一如此傷殘都莫涯君惟修職業男耒女繰車

和劉原甫白鸚鵡

出注輦國注輦在西海去中州
四十一萬舟行過西王母三年

乃達番
禺也

能言異國鳥來與舶帆飄嘗過西王母曾殊北海鯨雪
衣應不妬隴客幸相饒因憶禰處士舊洲蘭蕙凋

送劉定賢良下第赴廣陵令

劉蕡不登科衆口誦其策得者為之羞聞者為之惜摧
藏一時屈論議千古白至今簡篇中一字不敢易其言
究時病春刺若戈戟引經見大法非蹈春秋癖我朝屢
得人無不陞顯赫乃知所中否實命繫通厄中則首公
相人情作冠幘否則走仕途人情作履舄秋風廣陵城
千里夷門客壯心雖暫失美寶有時獲怙悵以送君致
龍翻點額

九日永叔長文原甫景仁鄰幾持國過飲

秋堂雨更靜佳菊粲粲芳置酒延羣公掇英浮新黃心
猶慕淵明歸來醉柴桑莫問車馬之去跡亂康莊

送鮑都官錢塘通判

文鱉游西海夕飛向吳洲朱鼈生明月淵潛未可求由
來有變化何能計沈浮君子蹈出處誰將等隅陬臨水
賦二者相送無離憂

送通州通判刁國博

古郡見郎山海雲遮一半陽鳥出滄波光彩臨硯案小

吏抱牘來磨墨為點竄豈以島嶼人百事皆漫漫朝廷
通守任不使守專斷是恐繆其才民勞乃生亂辛勤雖
然多魚鱗莫知筭夜月上蓬瀛偷閒舉杯看因行計較
足少別休興歎

吳資政挽詞二首

天下文章老為公地底銘平生懷道德鋪寫若丹青蒲
市一朝罷洛人皆淚零嗟嗟廟堂貴今以柏為庭
栽栽陞土厚自古葬賢人百尺不逢水千年空閉春夜

臺埋琬琰隴道刻騏驎西望緣纓淚曾無幕府賓

九月二十四日大風

秋飈無蹤跡空中聲奔馳枯桑因已驗老病仍先知驚
沙入破隙危葉墮綠枝幽懷聒不寐山岳將恐移

二十五日雪

秋露未為霜秋空已飛雪著樹增葉危慙叢憂菊折平
明開戶看斗覺頽簷潔天時莫倉猝誰預衣裘設

送唐待制子方北使

王命來天外闕氏坐帳中儀雖聘鄰國禮豈異和戎漢
使方持節胡人自帶弓惟應沙漠凜不減諫臣風

送劉元忠學士歸陳州省親

芸香閒秘秩蘇合著新裘公子言歸日天王賜問優治
分周太宰禮重漢諸侯拜慶無如樂黃金作酒舟

送陳賢良忠正軍簽判

書對三千字恩科第一人鯢魚飛北海龍劍躍平津直
悟聰文主深論險剋臣已能明世弊枉作幕中賓

送韓持正寺丞知餘姚

君家二仲父連為吳越宰錢塘與蕭山治跡應無改魚
蝦莫厭腥網罟從人采天晴姚江深縣鼓朝翻海

送周介之學士通判定州

相公秉文武視卒如嬰兒今往佐其軍豈不重撫綏我
有愚者慮贈君臨路岐相公居并州拓土曾不疑羌戎
起潛變一旦覆我師我師無不勇將吏實易之常抱雪
恥志此旨君所知兵家尤戒貪持重養以威正當土門

路自昔屯虎貌朔朝及旬望大校飫酒卮未若投簞醪
共飲河水湄古人維其均今人意參差臨事欲之死身
往心已移上能同甘苦下必同安危願君因議論茲語
何難為

送番禺杜杆主簿

行識枕榔樹初窺翡翠巢地蒸蠻雨接山潤海雲交訟
少通華語蟲多入膳庖不須思朔雪梅吐臘前梢

還柳瑾秘丞詩編

吾友蘇子美聞昔許君詩子美今下世令人重嗟咨當
其不得志泥水蟠蛟螭未激西海流安可氣吐霓吳洲
逢朱鼈腹有百碧玉遺他時使我觀我觀顏忸怩便欲焚
筆硯柰何難爭馳

送張殿丞吉甫知資陽

單騎欲之蜀綵衣初過秦王喬鳬是烏陶令酒名中灞
上愁逢雪襖中喜見春兩川風物美不似走京塵

丁端公北使

出聘天王使來乘御史驄馳車看燕雪貂扇禦邊風俗
與華人似言從左袵通蜀庭觀拜舞不似未央中

張斯立遂州司理

自身買馬筆為婦置幕羅將出咸陽門同涉蜀道危疇
昔未祿仕日夕講書詩不能青雲高乃作黃綬卑前人
未遇時往往甘棲遲如築九層臺始起一板基雖然用
功深歲久終莫墮我今惜君行無力可致之去勿藉芳
草世俗多夸毗

寄題哀賢亭

馬仲開龍圖墳
前所初立也

蒼蒼墓間樹亦有黃鳥哀賢者不在世常恨埋蒿萊山
根入溪泉流響出夜臺東方見子胥助濤高崔嵬

荅建州沈屯田寄新茶

春芽研白膏夜火焙紫餅價與黃金齊包開青蒻整碾
為玉色塵遠及盧底井一啜同醉翁思君聊引領

送曹測崇班駐泊相州

知君鄴城去歷覽古時蹟
戔戔銅雀臺其下遺瓦礫不

化鴛鴦飛多近蟾蜍滴哀哉魏武帝雄智圖九錫俄聞
望西陵作妓向朝夕曾何百年間事往如霹靂空餘幾
仞土陰峭古蘚碧下有牧羊人上有牂與羶寒風吹枯
草草短聲刺刺珠翠為埃塵冠劍埋百尺顏回飲一瓢
仲尼不暖席擁徒食人肝生莫如盜跖令名今猶存焉
在刻金石我輩當太平白首如戰敵又知為善樂尚媿
苟仕籍行行勤撫兵豎威酬德澤

十一月二十三日歐陽永叔劉原甫范景仁何聖

徒見訪之什

夷門魏公子來過抱關人
車馬立市中貴義不恥貧
市人無不驚此老面鰲鰓
豈將流俗眼能辨玉與珉
爾後幾千載此賢埋埃塵
誰謂四君子蹈古猶比辰
上馬後苑門訪我東城闥
為公開蓬戶沽酒焚紫鱗
銀杯青石盤共飲不計巡
薄暮各已醉歡笑頽冠巾
來既無猜嫌去亦無疎曷
若世上士惟顧勢力均

次韻和原甫陪永叔景仁
聖徒飲余家題庭中枯

菊之什

九日車馬過我庭黃菊鮮重來踰七旬枯萼無復妍自
非凌霜操枝葉徒相連衰敗未忍去根荄尚翹然不意
憔悴叢猶為君子憐固值時節晚豈恨地勢偏直如木
上蘿緣蔓欲到天一朝風雪厲零落向暮年至此事乃
等高低復何言公休誇松柏彭祖與顏淵各不相健羨
焉能論柔堅願公時飲酒周孔今下泉

次韻和永叔飲余家詠枯菊

今年重陽公欲來旋種中庭已開菊黃金碎翦千萬層
小樹婆娑嘉趣足鬢頭插藥惜光輝酒面浮英愛芬馥
旋種旋摘趣時候相笑相尋不拘束各看華髮已垂顛
豈更少年苔色綠自茲七十有三日公又連鑣入余屋
堦傍猶見舊枯叢根底青芽歎催促但能置酒與公酌
獨欠琵琶彈啄木所歎坐客盡豪英槐上凍鴟偷側目
盤中有肉鴟伺之烏鳥不知啼觥曲諸公醉思索筆吟
吾兒暗寫千毫禿明日持詩小吏忙未解宿醒聊和屬

送李獻甫寺丞知虹縣先歸金陵

今日歸為美塗金作馬纓願言膏沐婦相望石頭城得
邑柳堤合還家梅野晴里中多樂事州牧是名卿

衛尉邵少卿挽詞二首

位至九卿亞年過七十春桐鄉歸葬日棠樹去思入霧
裏開蒿隧原邊起石麟地遙徒有淚灑向北風頻

買得吳門宅歸來自種花春風未歌徹東岱已魂賒昔
作千年調今為一日嗟人將鑄美德磨石取江沙

次韻和永叔對雪十韻

玉月梨梅柳
絮粉皆不用

紛紛何亂目凜凜自開門著莫風難定侵凌物已繁裝
成新樹色遮盡古苔痕冷入梁王苑清乘衛國軒欺貧
凍蓬草增險想輾輾小隙皆能及洪爐逼不溫雲衣隨
處積水甲等閒屯團戲為丸轉堆雕作獸蹲豈愁穿破
履幸喜有清樽誰問諸公子高樓與後園

寄題劉仲叟澤州園亭

城臨太行谷谷暖宜草木既移洛陽花又種阮家竹五


色雜黃紅一林常翠綠其間廣亭開亦欲危榭築春歸
百禽豪搏黍及布穀桑上啄椹食林下窺果熟果收椹
已盡飛去不須逐婆婆黃楊樹誰謂逢閏縮物猶有進
退此理何用告余心當效君未有地可卜綴書豈貪樂
且以苟微祿

送李灝秀才南歸

乘驢雪中來別我千里歸江南梅花發身與越鳥飛幾
年客大梁著盡篋中衣空餘一束書去恨識者稀



宛陵集卷二十二



總校官庶吉士臣張能照

校對官庶吉士臣戴心亨

謄錄舉人臣孫潢

欽定四庫全書薈要

集部

宛陵集卷二十三

五

詳校官助教臣常循




欽定四庫全書薈要卷一萬四千四百六十四

集部

宛陵集卷二十三

宋 梅堯臣 撰

送刁經臣歸潤州兼寄曇師

古來山林士一往不復返區區世上名豈畢車自挽前
有高山危後有落日晚未知所止息已慕田家飯愛君
京口歸萬事不著眼乘馬飾鞍轡乘舟畫屋版長途與
白浪健駛固莫限力殫風定時各各繫岸棧寄語老空

人青嵯勿鋤剗

贈狄梁公十二代孫國賓

雄雉飛上天牝雞白日鳴驅逐鳳凰雛百鳥不出聲豈
無鵑與鶚至死莫得爭孤鶴獨不懼使風羽翼成鶴性
本君子嘹唳通太清至今有其孫踉蹌田中行明時與
稻粱重節亦貴名爾無冲天力且與鶯鶯并慎勿啄泥
穢坐使白鷺輕

寄金山曇穎師呈永叔內翰

江中我，我山上有道人。住風濤響殿閣，雲霧生席屨。道人如不聞，道人如不顧。誰能識此心，來往只鷗鷺。京洛三十年，塵埃一相遇。我與信都公，已落衣冠故。平生守仁義，齒髮忽衰暮。世事不我拘，自有浩然趣。末由逢故人，坐石語平素。

寄題刁經臣潤州園亭

新作城邊圃，陂原上下斜。竹多劉裕宅，松接戴顓家。山色不須買，江流何處涯。但邀東海月，莫聽五更鴉。

次韻和永叔夜坐鼓琴有感二首

夜坐彈玉琴琴韻與指隨不辭再三彈但恨世少知知
公愛陶潛全身衰弊時有琴不安絃與俗異所為寂然
得真趣乃至無言期

舜琴曰朕有語舜鬱陶乎孝悌怨則否傲狠愧豈無我
嘗撫卷歎歎此孟氏書此書有深意仁義世久虛公今
乃有感其不在茲歟魚躍與鶴舞物情曾未殊無情則
無應何必問烏魚

李尚書挽詞二首

相門三世貴家法百年同天子賜恩禮史臣書祖風
旂聲穿苦霧隴穴啓寒蓬自古焉能免於茲是始終
伊水西頭月青山北脚雲夜臺無復曉陰嶺有時熏
龍劍雙埋沒庭蘭竟鬱芬不知門下客誰刻道傍文

送朱司封知登州

駕言發夷門東方守牟城城臨滄海上不厭風濤聲
海市有時望閭屋空虛生車馬或隱見人物亦縱橫
變怪

其若此安知無蓬瀛昨日聞公說今日聞公行行將勸
農耕用之卜陰晴

送代州錢防禦

堂堂鴈門行赫赫符節分紫塞千里障紅旗十萬軍世
家王爵貴祖廟將臣勲鐘鼓陳牛酒衣裘論典墳呼鷹
下青漢牧馬出黃雲竇憲何為者燕然解勒文

寄題廬陵董氏桂林書齋

山東桑柘多江南松桂茂種桑事春蠶栽桂事華構嘗

聞雲蓋下聚書為大富往往見子孫緣天掇星宿掇星
星若珠光彩出屋漏秋收萬種田作酒日為壽亦有千
里歸錦衣行白晝

次韻永叔乞藥有感

子厚論鍾乳要若鶩翎筒安取啗棗栗謂相出山東所
產有所美慎勿憑村僮公問我餌藥石白將使礪我餌
乃藤根得方非倉公曾聞李習之其品今頗同此物俗
為賤不入貴品中吾妻希孟光自春供梁鴻荏苒歲月

久顏丹聽益聰雖能氣血盛不療貧病攻何如面黧黑
腰金明光宮亦莫如學釣緡鉤懸香藟但知烟水樂寧
計身瘠豐我生無快意豈異抱篤癘公乎忽我求略辨
雌與雄雄赤而雌白由來不同功沙合固切似朋好殊
未窮長年苟不過笑殺渭上翁

和王景彝正月十四日夜有感

燈光暖熱夜催春天半樓開飲近臣馳道橫頭起山岳
露臺周匝簇車輪隔簾艷色多相照下馬輕豪各競新

我已暮年殊趣嚮濃油一盞案邊身

送雷太簡知虢州

牛車讀古書少作游秦客一朝起為郎華省何赫赫若
有南山雲時時生枕席雲潤不益老呼吸乘間隙抱病
初駭聞既愈賴藥石遂請虢太守虢事簡且適况有三
堂存韓詩猶可覲永歌復飲酒東平希阮籍

次韻和景彝元夕雨晴

春雲收暮城九陌灑然清星出紫霄下月從滄海明車

音還似畫鼓響已知晴靜閉衡門卧無心學後生

早春書局即事

薔薇結舊蔓天桃種新紅傷根桃不死著架蔓依叢要以玩芳物亦寧負春風誰念太行下移谷學愚公

古意

林中即鹿人常為虎所即虎豈援鹿者亦各求其食趨利不顧害禍患安可息古來遯世士輕彼用智力

送李閣使知冀州

騷裏黃金絡春風北渡河將軍守漢法壯士發燕歌綠
水塘蒲短晴天塞鴈多家聲復年少矍鑠笑廉頗

郭園梅花

二月一日

未逢柳條青獨見梅蘂好猶怯春風寒不比江南早清
香拂酒杯素色欺蓬葆佳人金縷衣唱徹嗟身老

送襄陵李令彥輔

李宋丞相妹婿永叔
少居隨州常往其家

公相為近親翰林為故人親舊各貴顯青袍未離身六
十去作令豈慕要路津又思漢東歸便置漉酒巾深希

陶淵明澹然意已真食棗齒易黃晉俗誠自淳尚不顧
隋珠安肯與此鄰送君識君心掃跡向世塵

且歸漢東
便欲致仕

詠劉仲更澤州園中醜石

君家太湖石何從太湖得太湖天東南太行天西北相
去三千里雖有何致力古人煩舟車頑質無羽翼竅引
木蓮根木蓮依以植秋蛇出其中舌吐虹霓色君嘗夸
於我怪怪亦特特以醜世為惡茲以醜為德事固無醜
好醜好貴不惑

送趙子淵知潁州

舊穀不棲畝新春原鹿饑野荒多寇彼詔發撫疲羸驛
騎東風急蓄田小雨遲應同漢太守膏澤亦能隨

寄題楊敏叔號州吏隱亭

賢哉號略君守號事頗簡有亭後園中登覽早至晚了
松栢關氣象入醉眼花草發瑣細禽鳥啼曉
竟日人不來亦莫去杯盞

次韻王舍人憶省中小桃寄江學士

淺綻燕脂紫蠟芳深斟吳酎白瓊觴鳳池人憶去年艷
雉省客無今日狂髣髴物華先上苑依倚歌吹下昭陽
平明社雨莫催促應翫移牀欲近傍

去歲正聞
禁中賞花

次韻劉原甫社後對雪

社日遇群飲北風歸馬驕陽烏雲斗晦來燕翅難調朝
霰侵花冷春陰到地消宿醒無酒解薄被覺寒饒爐炭
重然獸衣裘更御貂蟄宮蟲復閉時鳥腹將枵點綴何
多思輕狂不奈飄誰知妍可玩寧恤氣為妖剡客偶然

興海神非次朝唱高仍和寡公又作長謠

次韻永叔二月雪

春雪損萌芽未必摧杞菊我心無愛憎隨分樂自足桃
李紅間白豈不悅我目杞菊嫩且甘豈不飽我腹看花
食蔬仍舉杯趣取衰遲鬢猶綠

聞王景彝雪中禡祀還

二月漫漫雪齋宮夜寂寥壇場祠乙鳥桑柘響陰梟履
帶春泥重駒回廣野驕還批五色詔池上踏瓊瑤

來帖
云絃

歌之外時復

林梟哀鳴

次韻景彝祀高禩書事

聞說郊禩喜氣翔曾由乙卯命封商
今朝鐘鼓登歌祀何日熊羆作夢祥
掃雪野廬風凜凜陞壇公衮佩鏘鏘
君門賜胙予何有不似矜誇鳳沼傍

次韻和永叔雨中寄原甫舍人

賴得春巢燕未歸高簷終日雨
衰衰細籠芳草踏青後
欲打梨花寒食時美景已嗟空過盡
名園猶許悞相隨

錦鞍切莫九衢去拍拍一如鶩鴨池

社日曾慎
赴北園

毛君寶秘校將出京示予詩因以荅之

古城踏成谷不見人馬蹤古人豈不行舊跡豈不重從
何求故步往返自憧憧觀君百篇詩善畫人形容毫髮
無不似落筆任橫縱曷如握明鏡物物目所逢贈以東
南歸擲去手中筇

劉仲更於唐書局中種郁李

冷局少風景買花栽作春前時櫻桃過今日雀李新擲

條紅蓓蕾婀娜含雨勻舊來薔薇叢饒借與近鄰始移
棣萼密不慙車下榛日暮綴書罷暫賞舉杯跋

和劉原甫復雨寄永叔

堦下青苔欲染衣晴光纔漏又霏微衝風燕子銜泥去
隔樹鶉鴒嗔婦歸乍冷乍陰將禁火自開自掩不關扉
渾身酸削懶能出莫怪與公還往稀

送正仲都官知睦州

每嗟相逢少常苦離別多行行復壯壯往往起悲歌古

來易水上義士有荆軻捐軀思報恩飲恨歌奈何況彼

兒女懷牽纏如蔓蘿是以世間人鬚髮易番番喜君得

郡章東歸隨春波灘上嚴子祠繫船聊經過其人當漢

興富貴不可羅足加天子腹傲去釣于河冬披破羊裘

夏披破草蓑心中小宇宙尤哂獻玉和我慙賤丈夫豈

異帶面讎未免為鬼笑誰知懼揮訶安得如君行收跡

已蹉跎空將閒歲月塵埃浪銷磨正同三峽賈盡力向

盤渦

續永叔歸田樂秋冬二首

秋風忽來鳴蟋蟀
豆葉半黃陂水枯
織婦夜作露欲冷
社酒已熟人相呼
坎坎擊鼓坐林下
醉去自有兒童扶
壯男獨獵南山虎
中子已投荒徑孤
田家此樂樂有餘
食肉緝皮裘豈無我
雖愛之乏寸土待買
短艇歸江湖
北風如刀割寒骨
穀已成困不倉猝任
從密雪落交加
旋採乾薪燒榾柮
鋤犁滿屋牛在牢
鵝鴨亂鳴雞亂發
割烹炊黍待鄰叟
飽向茅簷閒兀兀
田家此樂樂無涯

誰道一生空汨沒
公布平子定何如
我效梁鴻終適越
和介甫明妃曲

明妃命薄漢計拙
憑仗丹青死悞人
一別漢宮空掩淚
便隨胡馬向胡塵
馬上山川難記憶
明明夜月如相識
月下琵琶旋製聲
手彈心苦誰知得
辭家只欲奉君王
豈意蛾眉入虎狼
男兒返覆尚不保
女子輕微何可望
青冢猶存塞路遠
長安不見舊陵荒

酬楊愈太丞之壽州見別

疇昔西州謝法曹聲名籍甚我徒勞升沉一府已荒冢
憔悴兩人猶二毛眼見榮華能幾日心知富貴只秋毫
淮南魚美香粳滑飽去清吟豈不高

贈太子太傅王尚書挽詞二首

周原開隴隧鹵部葬名臣北極履聲絕東朝車跡湮藏
舟移夜壑棲鵬去承塵共看劉寬墓碑陰幾許人
平生性忠厚所守必尊君面實賢愚混心惟白黑分事
光中執法書集右將軍天意苦埋沒北邙松柏墳

送陝西都運彭待制

塞下兵難去關中粟未多君心同漢帝糧道得蕭何函
谷馬蹄入渭橋車轍過地形終險固山色舊嵯峨不媿
先賢傳重聽得寶歌歸來奏天子安穩看鳴珂

送羅職方知秀州

陸雲嘗誇千里莼便輕羊酪同埃塵君今得郡正千里
已患無羊厭此珍乃知南北各所樂乘舟不如乘馬惡
水邊不見秦羅敷縱有西施肌肉薄使君事事未稱意

綠水芙蓉定何若

寄懷劉使君

敬

昔我從仲父三年在河內春遊丹水上花竹弄粉黛人
誇走馬來盡眼省沒背薄暮半醉歸插花紅簇隊使君
今少年時往勸耕耒安行過樹下野杏正破顰何不學
山公酩酊還倒載令人知使君心膽不瑣碎切莫懲婦
翁慷慨臨并代一朝由謗謫雖去民苦愛實計幸不幸
豈較進與退因書寄此懷縑墨老且悔

贈僕射侍中劉相公挽詞三首

處外諸侯重居朝聖主知祆逢庚子日夢異武丁時歸
榔關山遠凝笳道路悲欲傳千古跡佐世本無為

古今皆可見富貴不常存歌者未離席弔賓俄在門朱
輪空返轍綠酒尚盈樽人事固如此令名貽後昆

歎此微末跡見公三十年貴為天子相能擇大夫賢東
第門闌在南州隴隧延立碑思叔子墮淚峴山前

送胥平叔太博通判湖州

依依堤邊柳泛泛水中舟舟行無遠近柳影不隨流東
風欲粉絮相逐江上頭正見魴魚來貫條尾脩脩使斫
橫刀膾便銷千里愁檣端燕暫語即飛入高樓樓中饒
客飲共候風色柔明朝同掛帆直過南徐州吳地多平
湖纜拖明鏡秋芙蓉拂雨舫女艇花底謳不羨乘五馬
却逢羅敷羞此官當此時莫憶塵中游

寄題張令陽翟希隱堂

每讀陶潛詩令人忘世慮潛本太尉孫心遠跡亦去不

希五斗粟自種五株樹曠然箕山情復起濠上趣今時
有若此我豈不懷慕

李士元學士守臨邛日有穀一莖九穗者數本芝
數本蓮花連葉並蒂者各一本因賦之

臨邛傳瑞日太守在郡時既多九穗穀復有三秀芝芝
以保萬壽穀以豐東菑更看芙蓉葉並蒂照清池

宛陵集卷二十三